

蒼
叢
編

清
俞樾纂

第三冊

進步書
局校印

曾最編卷八

清 曲園居士纂

周貞靖先生

周貞靖先生齊曾字唯一。癸未進士。除廣州順德令。自解官歸里。丙戌後入山為沙門。人稱曰囊雲大師。其歿也。里中謚為貞靖先生。不使淪於沙門也。先生生平出處大節。及他言行著作。俱岸然無所附。自為童子時。讀論語孟子治本經。俱不喜兼集注。率大書正文。默解其義。是其少讀書也。蓋不附傳注。諸生競為揣摩場屋之文。先生盡擺落華藻。自書所得。會試吳磊齋先生奇其卷。判曰自成一解。遂得中進士。是其為制義也。蓋不附主司。當先生時。三吳諸名士競尚標榜。先生漠然無所向。是其於士類中。蓋不附品目。其為順德令。治行第一。當事使攝香山。香山時為上相里。先生與相忤。即日解組。當事留之不得。是其為吏也。蓋不附上官。不附鄉大老。會稽行朝失守。浙河以東士大夫率俱出。上謁郡縣。通往來。先生不可。盡薙髮入山。白石一鋤。蒼松一筓。同年生有為郡觀察。招以書。先生謝不往。且曰孤雲去來朝不知暮宿所。從此無更費八行。是其出處大節。蓋不附一世。先生家居。每一匠者入門。即審視。

其法自仿造所用器。輒能善其事。及於盤谷構山房。束竹覆茅。盡出己手。得懸屋一奇。木製為養和。日坐卧其間。拾燒餘以為爐。狀絕古。先生復能受勞苦。其入山當由一溪水。嘗沒踝以上。先生謂過溪若須筏。即須竹。須舟。即須版。須篙。須梁。即須編柴。即待負亦須人。不如用吾脰。吾脰自善涉。嘗與諸禪人涉。俱不脫芒屨。先生謂沙石齒齒。芒屨質柔。不及吾足。版竟跣而涉。萬悔庵先生嘗訪先生山中。先生為設麪。下以齏汁。麥甚麤。先生笑曰。此吾上客供也。時諸公邀跡沙門。率受諸釋老衣拂。椎鼓上堂。稱其法嗣。先生獨不肯。雪竇石老人。其欲傳先生蓋久矣。然微聞先生時一歸村居。仍入彥倫之室。遂得止。是其遊於釋門也。蓋不附釋門。閒為詩古文詞。未嘗有所擬議。單言片句。不蹈前人。是其為文章。蓋不附諸大家作者。黎洲黃先生以先生與會稽余若水合銘。兩先生風格並高。未嘗相往來。先生謂自潔其身耳。吾耕不須耦者。吾負不須戴者。是其避世也。蓋不附同隱。

見李鄭嗣果堂集

吳重光

吳重光。桐鄉人。幼失父。恃其祖成立。祖尋故。與幼弟居。粗知書。以家落不竟讀。好氣任俠。先是光外姑。絕愛憐光。苦其貧。出若干金為營衙胥。作門戶。一日。衆胥剖與例。

金詰所自。衆告之。故擲諸地曰。此業錢也。安所不得一盂飯。乃從地獄中覓衣食乎。自是絕足不入官。甲申春。官征三餉甚急。挈弟之鄉理蠶務。完官稅。提筐桑於野。風聞燕京不守。棄筐走入城。問京城壞乎。衆雜曰。然。皇帝奈何。曰。與城同壞。帝二子何在。曰。闕業自帝安所得二子者。捫腹曰。痛甚。繞屋而啼。踰牆入。仰天號曰。一至此乎。小人革命。遂伴皇帝死足矣。作數字。押硯底。遂自經。弟以蠶飢。桑不至。覓兄不得。入城跡之。鄰母曰。頃聞哭聲。戶出而局如故。可疑也。急排牆入。救之無及矣。其硯猶濕。

見周拱宸集

馬生

馬生。甯夏人也。幼工騎射。讀書曉大義。不喜為經生制舉藝。見天下方亂。歎曰。誤天下事。制舉經生也。以任俠流落山東河南北間。夙善羅汝才。高迎祥。李萬慶輩。羣賊渠作亂。屠掠馬生輒棄去。弗與游。嘗過朱仙鎮。拜岳忠武祠。為文祭告忠武。時明崇禎十三年也。是年河南諸土賊蜂起。開州袁時中者。衆數萬。最雄傑。所部年皆四十下。健壯標悍。號小袁營。壽州賊蓋有袁老山。時中故號小袁營。以自別。十四年。時中度可衆二十萬。羣賊多懾附焉。自成攻陷洛陽城。尋圍開封。破歸德。諸土賊多來附。十

五年。朝廷命兵部侍郎某督援勦兵援開封。自成復陷歸德。開封亦遂陷。時中以其衆合自成。自成許配以如除歸德城外。地暨高臺十座。列騎張繡。徵梨園伶人十部。臺並奏樂。伎演曲其上。馬生乃往說時中曰。將軍視闖王何若也。附之為尊。安乎。兵興以來。王嘉允被誅。陽城高迎祥。劉哲。獻俘闕下。混天王授首於祖大樂。黑殺神。飛山虎。擒殺於盧象昇。他如顯道神。爬天玉。獨行狼等。悉以怙逆昧順。身蒙顯戮。將軍視闖王何若也。附之為尊。安乎。時中躍起曰。作賊豈本願。我獨不得傳汪二公歸命耳。孫督師阻域遙闊。丁公恐未足以共濟。君其為善圖。無兩相負。生於是走援勦軍門。拜伏侍郎前。力為時中乞降。侍郎乃索輸賂百萬為代請。生因極言時中實無有委積。且須四五十萬。生更反覆陳說。慷慨涕泣。候軍門數日。因大言曰。時中為自成軍鋒。素有郤。且冠雄諸賊。將懷不並立之勢。若諸路官軍進蹙其前。時中從中起擊其堅厚。自成可一戰擒也。異時闖部不從。萬監軍說招納羅汝才。俾賊至是。可為近鑒。今失此機。生見神州陸沈矣。侍郎終以弗輸賂。故竟不為受。時中降十六年。自成殺賀一龍。羅汝才。奪其軍。汝才大呼。恨未能從馬生言決降。固當至此。時中聞之。益不平。蓋當許女日。時中已引軍去。潁毫間別營矣。至是復用生計。斬自成偽官。並游

騎頭送河南巡按御史乞降。自成以軍攻殺時中。而小袁營以滅。自成部曲至百萬。衆馬生曰。我不忍獨負時中。因自縊岳忠武祠內。馬生嘗導李萬慶降。萬慶者。賊中號塌天者也。襄城之役。卒能臨危致命。賊非盡無良在御之者耳。馬生生平惟稱生不自名。見何昉晴江閣集

曲園居士曰。考明史。崇禎十五年春正月癸未。孫傳庭為兵部侍郎。督京軍救開封。六月庚申。詔孫傳庭出關。兵部侍郎侯恂督左良玉軍援開封。此云援勦。某侍郎蓋即侯恂也。明季政以賄成。并軍前事亦取辦於賂。烏呼。朝政至此。不亡何待。

陳曹二子

陳子名允昌。字允彝。鎮江丹徒人。少為諸生。薄制舉業。從事天文地理律曆。旁及太極六壬奇門諸書。與同縣曹子去非相友善。陳子學既博。人鮮窺涯際。乃語去非。獨解領明崇禎時。徐相國光啓推定歷用勾股測弧法。主黃道緯度。陳子顧言未悉合。參取劉基郭守敬一折衷利瑪竇。間以占候罔不驗。吳姓將出師。先事向人言。輔臣行出將弗及寇決還。已而言果中。大兵未渡河。輒數語人。某時渡河。某時且渡江。生平所著天文地理圖說卦變論星辰躔次歲時占驗教學參同辨正凡若干卷。曹子

去非名廷傑。家貧善讀書。更喜飲酒。以跛坐卧一小閣。元日拜先聖廟。與師景城何公神主。終歲不再出。酒後搦管立草數千言。家人告薪水匱絕。呼唔弗顧也。陳子數諷止其飲。曹子笑曰。遭時濁亂。我當希與陶阮仙遊。子達者。願止我飲乎。明天啓閒。嘗一至京師。代諸詞臣館試。輒擢高等。館都御史楊漣家。時漣疏糾逆奄魏忠賢二十四大罪。疏出。曹子手。曹子聞以示陳子。陳子覽未畢。色勃然變。數咄咄曰。謀害皇親一案。引督師輔臣為微。此大錯。國家方倚高陽公為安危。致奸璫日媒孽君側。其不壞我長城倖矣。然璫運已促。諸君留身為新主資。甚踰於捐軀無濟也。初奄黨疑疏出。繆昌期陷之獄。曹子心竊恨之。是後遂杜門不出。見何象晴江閣集

曲園居士曰。楊忠烈劾魏忠賢二十四大罪。世莫知其出曹廷傑手也。宜表而出之。然二十四大罪。實無謀害皇親。引督師輔臣為微之說。此所云云。又可疑矣。

張三愛

張三愛。歙人也。年四十。不妻。受役於其主。主貧。或告之曰。妻之可乎。張曰。否。愛主在不並受他人恩也。主固老縣令。逋租令索租急。當予杖。愛屢代主受笞至百數。不少。愛為人修長。且健筋力。多種蔬。售悉以其資歸。輒充衣肉於主。且曰。主老。不忍一

日衣肉缺也。獨養母所充衣肉與主同。一日母病且篤。愛家貧。自度力難置藥。乃乞牛羹於道路。路人曰。若愈母。便可以肝愈之。趨而禱於神曰。母病人告我以肝愈。我且以肝愈母。乃出短匕首。自劃其胸。五臟皆見。不見肝。復默禱之神曰。久矣哉。愛之不誠也。須臾肝墮出。愛急伸右手。以匕割肝如指許。徐以左手。緩緩還其破肝納於腹。束以白麻。以肝和羹奉母。母一飲而輒愈。先是愛恐自昏憤。默祝於神。至是不大痛苦。明日其兄聞諸醫。醫七日而創亦愈。愛主老。未受允。以弟之子嗣。嗣為人性黠。驚數恚愛。主易簪時曰。若事我。我且逝。女可使逃去。愛弗肯。事兩嗣如事主。且曰。不敢受主遺墨。輒遽齒平人自大也。嘗與其里人修荒墓之約。凡里中貲乏。不能以掩者。無主暴露者。愛自度貧無力。悉相率其鄰近。荷鋤載畚。以封築完固之。見王鳴雷中秘文集

程士章

孝子姓程氏。名士章。伯達其字。世為歙巖鎮人。生未識父。父巖註以太學生操鹽筴。開種遼陽外。未幾卒。所交馮都司者。葬之高達子阡。付牒守焉。語蒼頭識其地而歸。訃於時。孝子生六年矣。母王得訃。慟幾絕。孝子亦慟絕如成人。其祖拊之曰。兒至性如是。他日歸骨有望矣。蓋姑語慰王耳。孝子聞。輒哭瞠立。問遼陽道人。噴異之。二老

暨王相繼厭世。孝子年十二。稍長。惴惴懼不立。王前已為聘鮑氏女。既受婚。謀之比鄰翁。將為父歸骨。翁語孝子。遠陽八千里。徒御風而往乎。因言之方司徒任子以巽而授計焉。以巽心重孝子。常語人吾當成其志。孝子用是依之十四年。適以巽暴卒。孝子大慟曰。天不欲吾歸父骨而奪方公乎。巽子士達慨然曰。父志也。諭諸同志而身捐其半。以三百金假孝子。孝子感泣。遂辭行。蓋是時蒼頭可法八十猶健也。挈之從。孝子附舟入漕。夜夢天坼。若有神謂之云。覺而水發舟中。眾譁莫措。孝子泣禱。水忽退。舟衆弗測。至直沽發裝。則魚苴鱗。競謂孝子異人。不知為孝子也。歷八月始抵其地。訪高達子。已久下世。主僕惶惶莽曠。一路人晚法不去。法就詢。則高子世勳。故童時執役註者。因相持泣。出牒證墓所。孝子具棺啓窆。則儼然冠服眉鬚也。伏之慟。再拜起。遂失所覩。惟聚骨而已。孝子以生未識父。不敢誤萬一。嚙血濡之。良然。手其骨。諸指如或撫之者。集而失一膝。孝子慟曰。是其安之也。忽巨蛤吠不已。且若乘物焉。視之。即膝在焉。易殮。以一贏載骨。南道山海關。羸蹶躑躅不進。孝子持註出關。故符焚而號之曰。父可入關矣。絞若掣而羸從入。自是道無留。凡四月抵家。未至一夕。孝子妻鮑夢偉衣冠丈夫偕王坐堂上。明日註骨至。合王葬焉。

吳虛壑

王不庵有吳虛壑小傳云。虛壑吳氏名懷。始安人。早喪母。從父厲齋公。南雍落落鮮合。寓齋公卒。虛壑遂孤身狂走。西登嚴子陵釣臺。默坐竟日去。乙酉春。子游天姥獨踞峯頂。有風自東北來。山谷鳴吼。亂雲如擲絮。偶誦太白句。失聲長號。虛壑聞之曰。是奚為者。循聲而至。相見則大喜。一語連日夜不休。自是浙東千里名山大川。毋論昔人扣舷伐木之地。即古今共棄人所不道者。子兩人無不歷險窮支。往往落日孤峰。徘徊不忍去。時有蔣生者。從子遊。每佳處。輒為吟詠。以示兩人。但顧笑而已。蔣生竟不得意。趣所在。月餘先舍去。虛壑乃出所經山川險隘。遠近諸圖。數十緡示余。余以各得辨證之。虛壑復大喜。酌酒慷慨謂予曰。子有父兄在。非可同余浪游。余將舍子孤往。苟嫌吾懷熱骨寒。泉無恨也。未幾去而復來。來又去。數載始聚。予曰。可已乎。曰。未也。又忽去。後子遁於禪。聞虛壑在吳。吳中人莊事之。有以詩文贈質者。一日即棄去。諸人則日置酒擊鮮為奉。虛壑傲然曰。爾將尸居吳懷乎。竟馳去。諸余。余固止之。而虛壑是時亦倦游矣。友人曹生謂予。虛壑奇男子。既鮮兄弟。不可使無嗣。予語虛壑。虛壑良久曰。必貌陋。無一能。非處女。則可。生不測所謂。予曰。第從之。得曹氏女。

曾適洪者。姿首既拙。僅能事中饋。閒則兀坐如立樞。予過虛壑。必聯牀夜話。往往達旦。曹生亦時時來聚。杳不聞帷內聲。食具即自供。午夜炙酒淪茗不倦。予因歎曰。此真吳虛壑婦也。虛壑喜讀史。至是益肆力焉。嘗於夜讀有感。撫案痛哭。聞窗外有物騰突去。叢簿作摧裂聲。殺殺動人。次日見籬下虎跡。大小不一。谷口農家犬豕皆為虎攫去。虛壑貽予柬云。中夜忽感舊游。放聲一哭。林閒葉落不已。山婦執壺起立。助予哭。聲震空山。虎豹聞聲遁去。此時况味。恨不得王生共之。予賦空山哭紀其事。又數月。虛壑竟去。期於次春還。不至。前所從遊將生者。有故人自衡山歸。言虛壑卧病山寺。予念甚。屢於夢中哭之。又越歲竟不至。亦無從通一字。復有識虛壑而自楚來者。曰。聞有狂生久病山寺中。後不知所往。或云虛壑已歸粵。或曰猶在衡永閒。予曰。虛壑安所歸哉。殆死矣。其婦還依母。則猶曹生授餐也。見王煒鴻逸堂集

黃孟通

黃孟通名憲。華亭人。少即無賴。年十三。誤殺人。逃之嘉定。日糾里中小兒為搏戰戲。一日羣衆聚大塚閒。命羣兒列於前。獨坐石臺上。指揮叱咤。有老人晚之曰。孺子喜是乎。何不從師。孟通怒。欲毆之。近輒顛仆。遂拜於臺側。師之。盡得其技擊。嘗附一商

舶舟人盜也。縛其商沈於水。語孟通曰：汝自投死耳。孟通視諸盜中，一人持大斧，悍甚，因偽伏哀請，遽起奪其斧，斫之。盜墜水死，餘皆驚遁。孟通起商於水，得不死，操觚急去，易舟匿蘆葦中。羣盜跡至，不得，乃免。商人以百金謝，不受去。既復以殺人下獄，豎得出，乃從吳淞千總張喬興挾鹽徒出沒海洋。喬興敗，孟通潛遁太倉。值觀察沈公選將材拔用，孟通矯捷過人，每從檣上窺賊，能相去數丈，持刀躍入賊舟格殺之。賊覘知，孟通即避去。又嘗入嘉定訪舊，已醉卧，主人憑程訴其仇。孟通默無語，數以空拳擊牀，既得其里居，曰：吾欲睡，卿可去。主人去，孟通踰垣出，抵所讐之居，急叩門，以他事引出，拳殺之。明日傳某死，主人奔告孟通，謬相稱快，竟不言也。賊犯安慶，孟通隨總戎許自強進剿，宿松之敗，自強僅以身免，孟通獨將三十騎，縱橫賊隊中，歸而備兵使者馮公，奉巡撫張公命，選將材。孟通復就選，諸藝過人，而不諳策論，視平日之能文者，奪其策以獻，遂得第一。謁謝時，馮公稱其文武材，孟通以實告，公益喜，曰：此即英雄舉動也。白之張公，授把總，後以計某副將貪污，為自強所忌，斃之。海舟

中。見王律鴻逸堂集

榮小兒者古遂城人也。父凱歿家落。母趙氏雖不出貴族。恥依人作臧獲。久之竟無棲止。乃假市廛中。遷卒半舍以居。草簾葦薦。鵠面鵝衣。苟延已耳。小兒幼病。聾。父母以其痴也。不命名。但以小兒呼之。人呼之亦同。自壯至老。不易。小兒既痴。不能貿易。兼無資。日乞於市。性至孝。每出門。必向母叩頭。歸亦如之。食必跪進。擇其旨者。食母。餘自給。母食之甘。則起舞。否則泣。或值所乞無幾。母留之以啖子。小兒見食。不如常。則泣。如是者。終身如一日。小兒雖行乞。土人重其孝。無空者。或聞以酒肉饋之。坐是小兒得養其母。至七十餘。以無病終。死之日。小兒痛不欲生。時人哀之。為助棺。葬於邑西之二郎山。自是小兒日則叩頭於母之舊坐處。歸亦如之。擇其乞之旨者。不得跪進。每傍徨瞻顧。泣不已。冀北舊俗。清明前三四日。爭挂紙錢於邱隴。麥粥杏酪。以祀祖先。趾相錯也。小兒走墻。饋遺盈篋。攜之二郎山祀母。想卧古樹下。為狐狸鴉雀食之。比醒。疑母之果食也。踊躍起舞。既而覺其非。伏地大慟。土為之溼。鄉之耆老聞於邑宰。邑宰縣孝子。扁旌之。小兒不知。行乞拜跪自若。每思母。哀哀而已。年七十餘。亦以無病終。土人義之。為附葬於其母旁。

見陳僊燕山草堂集

永嘉狂生葉尚皋。字天章。順治丙戌秋。甌始歸附。尚皋婆娑市上。或歌或泣。如優人狀。家有妻女。皆棄不顧。夜則偃卧市旁。或數日不食。如是者八閱月。丁亥仲春上丁。狂益肆。陳詞孔子廟。橫甚。郡伯朱公。執白兵使者。雜治城隍廟中。時尚有欲活尚皋者。曰。且繫獄。在獄三月。多作詩歌。一日。取毫楮作自叙。賦絕命詞。以手扼吭而斃。時端陽前一日。故其詩有未斟蒲酒。賜先斷。不沐蘭湯。骨已香之句。見朱鴻瞻外園類輯

坦然先生

先生姓周諱文煒。字赤之。祥符人。素行屹立。人稱為如山先生。先生曰。吾如山哉。吾乃坦然者耳。因以自號云。少以文自豪。尤喜賓客。嘗數至千金。輒為人緩急立畫。而先生固安之。游太學久。以例補諸賢簿。諸賢令某貪而善驚獄。每以意旨諷先生。先生固爭之。有妬婦以炮烙斃其妾。令屬先生驗。邑人觀者傾市。先生逮婦痛笞之。人無不稱快者。其夫詭曰。是婢也。毆婢死。法不至抵先生。曰。創非刑斃人。家自為律。其罪甚於殺人。奮筆擬死比復令。令已入其夫重賄。庭質婦。觀者隨往。見令反杖妻父。所引斷乃如其夫所言。遂相與譟于庭。謂令乃不若簿。令方抱慙憤。及先生至。又厲詞色與令力爭。客乘閒謂先生曰。先生自屹然如山耳。安所見坦然哉。先生曰。噫。此

固吾之所以坦然者也。當爭則爭。予吾正為平易。而子何疑哉。今日夜銜之。而先生初不以為慮。方日與其邑人陳洪緩者為五洩游。歷七十二峯。且徧往返。至六七。每當奇曠處。洪緩作畫。而先生自為詩。卒以忤令。左遷王府官屬。會母喪。過哀。竟以病去官。家金陵。教其長子成進士。出為濰令。歷官中外。至戶部侍郎。人以為先生榮。而先生自若。于所居為昔有園。與向時賓客觴詠其中。謂之秦淮釣侶。又豫置一櫺。當風日晴好。被酒入則。使諸孫羣繞呼之。或擲梨棗出。使競相奔拾。以為笑樂。更自撰為墓志。無何而侍郎被讒。請詔獄。客為先生憂。先生曰。吾今固甚念之。然吾生平無一念足死吾子。而吾子又類我。於理不死。行當雪耳。卒與客飲酒自若。已而事果得雪。如先生言。予二長即侍郎名亮。工以德業文望著。學者稱櫟園先生。次亮節。以見董

正誼堂文集

蔡湘

蔡湘字竹濤。松江上海人也。幼穎敏。讀書目數行下。里有董先生者。授湘學。悉以藏書畀湘。因得縱覽博通。年十八。治裝別其父母曰。兒居海濱。終無所成就。願北學中土。庶從賢豪開游。歸侍大人。未晚也。遂渡江。踰淮。客齊魯。已而轉入京師。南海程職

方見湘詩。大為延譽。於是萊陽宋觀察新城王考功。皆迎致之。湘才既高。性又抗爽。不肯脂韋從俗。醉輒詈其座人。人目為狂。沛縣閻山人。飲合肥龔尚書坐。尚書酌山人曰。君名能相人。此閒誰定奇士。山人晚視良久。掀髯曰。吾所知布衣一人。殆異才。公曷致之。問其名。曰上海蔡湘。尚書立騎邀之。湘敝衣冠。惘惘而前。一座為改容。已各賦詩。衆客方沈吟閒。而湘泚筆疾書。不加點。尚書擊節歎其敏且工也。經歲西去。踰井陘。將歷龍門太華之勝。經太原。會嘔血。太原周郡守館留之。其友潘稼堂見湘稿。向作多削去。問之曰。燔矣。君其謂我畫地而趨乎。即此亦烏足存。庸詎知異日之。不為灰燼乎。未幾之交城。謁趙令君。令君與語相得。館之邑署。旬餘始出。龔宗伯程職方兩手書。訝其初不以通。曰。公賢。無須此。所以出視者。不可沒兩公愛也。在交署七月。病劇。潘自太原往視之。執手泣曰。君來吾瞑矣。問所欲。曰。吾負大人。吾負大人。為吾謝職方君。不及報矣。須臾氣絕。年二十六。

見周簣錄山堂集

金文

金文者。業販鹽浙中。為東南財賦之藪。而海濱斥鹵。鹽賦興焉。給引於商者。曰官鹽。舍是悉為私販。賣及買者。兩罪之。文少與仲氏出沒江湖間。凡販鹽之徒。遇輒相邀。

奪為利。獨文兄弟所至。人無敢攫者。既而仇家縛仲。刺兩目縱之。文為稍戢。來家禾之梅里。歲丙戌。鼎革之初。愚民多相聚為盜。距梅里半舍。曰嘉會都者。為其藪穴。四月下旬。盜率黨來劫。居民狼駭。奔恣其焚擄。是夕。文載鹽五六艘歸。近市望見火光。知有變。乃部署諸艘。退伏支港。約曰。賊歸。繞出其前後。呼應相接。并力擊之。賊可殲也。乃率四五人往據移寶橋。橋為賊歸要路。文持槩。餘人彎弓貫矢。以俟。羣盜舟方滿載。首尾銜次。相與謳歌笑樂。是夜雲霧塞天。相對昏黑。莫辨。而賊舟炬火獨明。將至橋所。十餘丈。大呼詰曰。來舟何為者。盜錯愕。因對矢發貫賊手。賊遽擾亂。後舟詰之如前。不能對。輒注射之。餘舟擁擠。不敢復前。賊數十人。乃執炬持器械。舍舟登岸。適伏舟衝賊前。至呼詰相應。文輒持槩從橋上躍就之。左右刺賊前二舟。舟覆。後賊皇遽。亦多赴水以逃。文躍入賊舟。橫刺之。是時伏舟出賊後者。亦衝至。相與呼應。遂合力奮擊。聲震四野。賊不支。愈擾亂。顛仆落水溺者甚衆。其登岸散走。竄伏榛莽。葦荻間者。村人又搜括之。皆反手縛送至文所。文至西塘口。南面坐。諸人持刀斧繩索。立其旁以聽命。列羣盜於前。驗其衣溼及體裸者。多推入水中。間或擲火焚之。其強武有力為賊首。及偵探為賊耳目者。疑似間不能悉辨。死八九。方是時。兵燹猶熾。